

Geistlicher Baustein Nr.74

**-Gnade wird dir gebracht bei der
Offenbarung von Jesus Christus-**
Albanische Übersetzung

Guri i Ndërtimit Frymor Nr. 74

-Hiri do t'ju sillet në zbulesën e Jezu Krishtit-

"Prandaj, ngjeshni ijët e mendjes suaj, jini të kthjellët
dhe vendoseni plotësisht shpresën tuaj
mbi hirin që do t'ju sillet në zbulesën e Jezu Krishtit."
(1. Pjetrit 1:13).

Hiri sovran vjen nga Dikush që është Sovran. Çfarë mund të bëjë një Sovran? Ai mund të bëjë atë që dëshiron. Dëgjoni tani me kujdes: Hiri sovran mund të jepet vetëm nga Dikush që është sovran. Dhe Perëndia është Sovran, prandaj Ai mund të japë hir sovran (1. Pjetrit 5:10-11). Meqenëse hiri është sovran, ai nuk ka nevojë të pyesë askënd. Ai bën atë që dëshiron. A nuk është kjo e mrekullueshme? (Psalmi 135:6). Ai nuk ka nevojë të pyesë: "A mund ta bëj këtë apo duhet të bëj atë? A mundem? A duhet? A dua?" Ai nuk vepron kështu. Ai vjen vetvetiu. Hiri është sovran, prandaj Ai mund ta shpëtojë edhe më të keqin. Ai mund ta shpëtojë më të ligun. Ai mund ta shpëtojë më të papastrin. Ai mund ta shpëtojë më të pamoralshmin. Ai mund ta shërojë më të sëmurin. Halleluja! Ai mund të shpëtojë një njeri të lig si unë, dhe Ai e bëri këtë. Çfarë është kjo? Hir. William Branham, biri i një pijaneci, kjo nuk ka rëndësi – hiri i Perëndisë më shpëtoi. Ai mund ta marrë mëkatarin më të keq dhe ta lajë të bardhë si bora (Isaia 1:18); nuk ka nevojë të pyesë askënd për këtë. Oh, Ai mund ta bëjë këtë, sepse është sovran.

Mbani mend. Dashuria dhe hiri janë motra binjake. Nuk mund të kesh hir pa dashuri. Ato janë motra binjake. Kjo është plotësisht e vërtetë. Përpara se të mund të kesh hir, duhet të kesh dashuri. Përpara se t'i bësh vërtet një të mirë dikujt, duhet ta duash atë. Qoftë ai në të drejtë apo në të gabuar, ti megjithatë duhet ta duash, përndryshe nuk funksionon. Kështu, dashuria dhe hiri janë e njëjta gjë. Ato janë thjesht motra binjake, dashuria dhe hiri. Ne nuk mund ta shohim njërin pa tjetrën. **"Sepse Perëndia e deshi aq botën, sa dha Birin e Tij të vetëmlindur..."** (Gjoni 3:16). Ai e derdhi hirin e Tij dhe e solli atë në...

.. .në zemrat tona nëpërmjet **Frymës së Shejt** (Romakëve 5:5). Shikoni, thjesht nuk ka asgjë që mund ta bëni pa njërën ose tjetrën. Hiri, hiri i Perëndisë është ai që na shpëton. Për këtë bëhet fjalë: hiri, hiri i Perëndisë. Perëndia solli hir në jetët tona nëpërmjet dashurisë së Tij për ne. **Hiri do t'ju sillet në zbulesën e Jezu Krishtit.**

Edhe diçka tjetër që hiri nuk mund ta bëjë: hiri nuk mund të blihet; hiri nuk mund të shitet. Ai është hir. Ai vjen nga një Sovran. Po, nuk mund të bësh tregti për të. Nuk mund të thuash: “Perëndi, unë do ta bëj këtë dhe atë, nëse Ti bën këtë dhe atë.” Kjo nuk funksionon. Perëndia nuk do ta bëjë këtë. Nuk mund të nxjerrësh asgjë nga Perëndia. Perëndia ta jep atë me hirin e Tij. Oh! **“Pra, nuk varet as nga ai që do, as nga ai që vrapon, por nga Perëndia që tregon mëshirë.”** (Romakëve 9:14-16). Kjo është e vërtetë.

Një metodist i ri erdhi tek unë, i cili kishte marrë **Frymën e Shejt**. Dhe të rinjtë pyetën: “Tani që jemi të shpëtuar dhe kemi marrë **Frymën e Shejt**, a duhet të shkojmë dhe të kërkojmë dhunti?” Unë thashë: “Mos e bëni këtë. Mos e bëni këtë.” Perëndia i jep dhuntitë e Tij në mënyrë sovranë. **“Sepse dhuntitë dhe thirrja e Perëndisë janë të pakthyeshme.”** (Romakëve 11:29).

Nëse shkon dhe kërkon diçka: “Perëndi, bëj që unë të bëhem predikues. Më jep këtë.” Atëherë çfarë do të bëhesh? Një njeri fodull, vetëm kaq. Do të shkosh tek teologjia e dikujt dhe tek ndonjë organizatë, do të vendosesh atje dhe do të prishet gjithçka. Lëre Perëndinë ta bëjë thirrjen! Perëndia do të të thërrasë (Romakëve 8:30); Perëndia do të të shenjtërojë (Hebrenjve 10:14); Perëndia do të të japë atë që Ai ka nevojë të të japë. Po, zotëri.

“Gjithçka që Ati më jep do të vijë tek Unë. Askush nuk mund të vijë tek Unë, nëse Ati që më ka dërguar nuk e tërheq.” (Gjoni 6:37-39,44).

Nëse Perëndia më ka bërë mua predikues, kjo nuk do të thotë se hiri i Tij ishte me mua. Jo, jo. Është vetëm hiri i Tij që më ka shpëtuar. Nuk jam i shpëtuar sepse predikoj Ungjillin. Nuk je i shpëtuar sepse flet në gjuhë. Oh, jo. Nuk je i shpëtuar sepse bën ndonjërin prej këtyre gjërave.

1.e Korintasve 13 e provon këtë: **“Edhe sikur të flisja gjuhët e njerëzve dhe të engjëjve dhe t'i njihja të gjitha misteret e Perëndisë (si një predikues), megjithëse do t'i bëja të gjitha këto, dhe edhe sikur të kisha besim sa të lëvizja malet, por të mos kisha dashuri, nuk do të më vlente asgjë!”** Dashuria është hir. Hiri i Perëndisë është ai që bën gjithçka (1. Korintasve 13:1-10). Për hirin e Perëndisë nuk mund të bësh tregti, por as nuk mund të hysh në të për shkak të dhuntisë sate. Ai është hir sovran.

Hiri e bëri këtë. Por njerëzit mendojnë se mund ta meritojnë atë. “Unë kam shkuar në shkollë biblike dhe kam mësuar këtë e atë, kam qenë edhe në seminare...” Kjo nuk do të thotë aspak asgjë. Ti nuk mund ta blesh hirin e Perëndisë. Hiri i Perëndisë është si në këtë histori, të cilën dëshiroj t’jua tregoj:

Një ditë ishte një mbret i fuqishëm, dhe ky mbret kishte një bir. Ishte biri i tij i vetëm. Dhe ndodhi që një ditë ky djalë u vra. Vrasësi iku dhe u ndoq në të gjithë mbretërinë. Më në fund e gjetën, e sollën përsëri dhe e futën në burg. Oh, ishte një gjë e tmerrshme, sepse ai kishte vrarë birin e mbretit. Ai e dinte se çfarë e priste.

Pastaj iu bë gjyqi. Ai u shpall fajtor dhe faji i tij u vërtetua. U dha një vendim. Atij iu caktua dënimi më i tmerrshëm me vdekje dhe duhej të vritej ngadalë, në mënyrë që jeta t’i largohej pak nga pak. I dënuar nga gjykatësi, tani duhej të vdiste.

Vrasësi lutej dhe qante: “Edhe pse jam fajtor, edhe pse unë e bëra këtë, më vjen keq që e bëra. Do të doja të mos e kisha bërë kurrë. Ishte vetëm në një shpërthim zemërimi që e bëra. Nuk doja ta bëja.”

Pastaj, një ditë, vetë mbreti shkoi në burg për ta vizituar djalin. Ai donte të zbulonte përse ky kishte vrarë birin e tij të vetëm dhe donte të fliste me të për këtë.

Kur mbreti zbriti poshtë, ai shikoi brenda qelisë dhe pa trupin e tij të dobësuar të shtrirë në një qoshe, duke qarë, fytur dhe sytë e tij të rrudhur, bebëzat e futura thellë në zgavrat e syve dhe shkumë në gojën e tij, sepse nuk kishte ujë. Mbreti hyri brenda dhe tha: “Çohu!” Djali u ngrit dhe e shikoi.

Pastaj mbreti tha: “Përse e vrave birin tim? Çfarë të ka bërë biri im? Çfarë bëri ai që të meritonte një vdekje të tillë dhe ti ta vrisje me një shtizë?”

Djali u përgjigj: “Asgjë, zoti im, asgjë fare. Thjesht ndodhi për shkak të shpërthimit tim të zemërimit. E vrava sepse isha xheloz ndaj tij dhe u mbusha me një zemërim të tillë, sa që e vrava. Tani po vdes nën drejtësinë tuaj, zoti im. E pranoj këtë dhe e meritoj këtë. Vetëm për këtë qaj, sepse më vjen aq keq që e vrava në këtë mënyrë atë njeri mbretëror, pa asnjë arsye.”

Mbreti u kthye menjëherë dhe doli jashtë. Ai shkoi te froni i tij dhe dha urdhrin: “Shkatërroni të gjitha regjistrimet!” “A e dini, hidhini...”

...ato në detin e Harresës! “Shkatërrojini dokumentet! Lajeni dhe silleni lart! Do të bëj qëta sjellin një rrobë mbretërore për të.”

Pas pak, një limuzinë e madhe ndaloi para derës. Pastaj u shtrua një qilim deri te qelia e burgut. Mbreti qëndroi pranë limuzinës dhe tha: “Eja, biri im, dhe eja me mua në pallat.” Ai ia hodhi mbi supe rrobën mbretërore dhe tha: “Që tani e tutje je biri im.” Sepse pati mëshirë. Ky është hiri. Ai isha unë, ai ishte ti.

Ne e kemi vararë Birin e Perëndisë me mëkatet tona. Ne ishim të huaj, të papastër, të burgosur në qelitë e botës. Por Perëndia na lau me gjakun e Birit të Tij dhe na pastroi, dhe na veshi me rrobën e **Frymës së Shejt** (Efesianëve 1:7-10; Kolosianëve 1:13-14). Dhe një ditë karroca e madhe e Perëndisë do të vijë te dera dhe do të na marrë në shtëpi, që të jetojmë me Të. Të gjitha regjistrimet janë shkatërruar; ne nuk mund të gjykohe mi më. Perëndia i ka hedhur ato në detin e Harresës (Mikea 7:19) dhe nuk i kujton më.

Atëherë hiri është e vërteta. Si mundet atëherë dikush të kritikojë dhe të thotë se hiri është i gabuar dhe se ne shpëtohem me anë të veprave? Ne jemi shpëtuar me anë të hirit, nëpërmjet besimit, jo me anë të veprave. Veprat tregojnë se ti je shpëtuar. Por ajo që të shpëton është hiri i Perëndisë. Hiri të shpëton (Efesianëve 2:8-9). Hiri është ajo që Perëndia bën për ty. Veprat janë ajo që ti bën për Perëndinë për të treguar vlerësimin tënd për atë që Perëndia ka bërë për ty. Por ti je shpëtuar me anë të hirit (Romakëve 3:23-26).

Disa mendojnë: “Meqë shkoj në kishë dhe e kam shkruar emrin tim në libër, kjo është gjithçka që duhet të bëj.” Disa mendojnë: “Meqë brohoras, kjo është gjithçka që duhet të bëj.” Disa mendojnë: “Meqë kam fuqi për të shëruar të sëmurët, kjo është gjithçka që duhet të bëj.” Nuk është kështu. Është hiri i Perëndisë ai që të shpëton, hiri i mahnitshëm i Perëndisë.

Unë nuk mund të mbështetem mbi asnjë meritë. Pali thotë te 1. Korintasve 13: “Edhe sikur të flisja gjuhët e njerëzve dhe të engjëjve, edhe sikur të mund të dalloja, edhe sikur të kisha dhunti, edhe sikur ta shpërndaja gjithë pasurinë time për të varfrit, edhe sikur me anë të besimit të lëvizja malet, edhe sikur të kisha njohuri për të kuptuar gjithçka, nuk do të isha asgjë, nëse nuk hyn dashuria, e cila është hiri.”

Perëndia duhet ta bëjë këtë. Ti mund t'i bësh të gjitha këto gjëra dhe megjithatë...

...je i humbur. Është hiri ai që të ka shpëtuar, hiri për njerëzimin. Ai më lejoi të shkoj në mbarë botën, te kombet e botës, te miliona njerëz, dhe kam parë se si miliona vijnë te Zoti dhe e pranojnë Atë si Shpëtimtarin e tyre personal, se si mbushen me mirësinë e Tij dhe shenjtërohen me fuqinë e Tij, se si shërohen me fuqinë e Tij të madhe të plotfuqishme. Kur e shoh këtë, mund të thërras si profeti: **“Jo me fuqi dhe jo me forcë, por me Frymën Time!”** (Zakaria 4:6). Jo me arsimim, jo me teologji, por me **Frymën e Perëndisë**. Ai i shpëton njerëzit. Nëpërmjet **Frymës së Perëndisë** Ai i shëron njerëzit. Është **Fryma e Perëndisë** që ua jep Mesazhin njerëzve. Është **Fryma e Perëndisë** që e vërteton Fjalën.

Sipas profecisë (Zakaria 4:6-7), do të vijë **Guri i Kreut**, i cili është Krishti. Dhe unë dua që ju të vini re se kur të vijë **Guri i Kreut**, princi, i cili shpall Mesazhin, do të thërrasë me zë të lartë: **“Hir! Hir!”** Sepse është me anë të hirit që ne jemi shpëtuar, jo me anë të veprave, që të mos mburret askush. Dhe Mesazhi i hirit është shkelur nën këmbët e njerëzve, derisa është bërë një pahir. Disa dalin me një mesazh të sigurisë së përjetshme dhe me gjithfarë gjërash të tjera. Por Mesazhi i vërtetë i hirit mbetet i njëjti, dhe Satani përpiket ta godasë atë jashtë Kishës. Por është hiri i Perëndisë, me anë të të cilit ne të gjithë jemi shpëtuar (Efesianëve 2:8-9).

Ne kemi sot teologë dhe njerëz të mëdhenj në të gjithë botën, të cilët janë të zgjuar, inteligjentë dhe të arsimuar. Por nevojitet thjeshtësia për t'i besuar Perëndisë, për ta shpallur Fjalën e Tij, për të treguar se **Jezu Krishti është i njëjti dje, sot dhe përjetë**. Nevojitet një zemër e përlurur, e përkushtuar ndaj Perëndisë, për ta sjellë Jezu Krishtin në pranë. Amen.

Nëse do të nevojitej teologjia, ne njerëzit e varfër dhe të paarsimuar nuk do të kishim asnjë mundësi. Por nuk nevojitet dituria. **“Jo me fuqi dhe jo me forcë, por me Frymën Time,”** thotë Perëndia, **“Unë do ta shpalos këtë mister.”** Dhe Ai do të thërrasë **“me britmë të madhe: Hir! Hir!”** Kjo është ajo që është sot: hiri i mahnitshëm i Perëndisë për popullin e Tij. Se si Ai i merr të paarsimuarit dhe të pamësuarit dhe tregon se **Jezusi është i njëjti** (Mateu 11:25-26).

Tani, jo çdo njeri këtu sot duhet të gjykohet në fund. Njeriu mund ta lërë veten të gjykohet sot, nëse dëshiron të gjykohet (1. Timoteut 5:24). Tani, duhet të ketë një përgatitje për gjykimin. Kur Perëndia deshi ta sillte Adamin dhe Evën në praninë e Tij, Ai duhej të bënte një përgatitje për këtë. Tani, si e bëri Ai këtë? Nëse nuk besoni në hir... Hiri bëri një përgatitje. Oh, sa i lumtur jam për këtë! Hiri bëri një përgatitje. Hiri është dashuri. Perëndia i deshi aq shumë krijesat e Tij të rëna, saqë bëri një përgatitje, që ato të mund të qëndronin në praninë e Tij përpara gjykimit. Perëndia shkoi, vrau dele ose kafshë të tjera dhe u vuri atyre lëkurat mbi ta për t'i mbuluar. Gjaku u derdh i pari përpara gjykimit. Gjykimi ishte, natyrisht, nëpërmjet gjakut. Dhe kështu Ai derdhi gjakun e të pafajshmit për të mbuluar fajin e fajtorit (Zanafilla 3:21).

Hiri është ajo që Perëndia ka bërë për ty. Por veprat janë ato që ti bën për Perëndinë në shenjë vlerësimi për atë që Ai ka bërë për ty me anë të hirit. Kjo është e gjithë përgjigjja. Kur jam i shpëtuar, atëherë jetoj si një i shpëtuar. Por unë mund të jetoj si një i shpëtuar dhe megjithatë të mos jem i shpëtuar. Shikoni, ky fakt na sjell në këtë pikë, që ne duhet të lindim përsëri (1. Pjetrit 1:22-23).

Kështu, përvoja e rilindjes tregon se çfarë jemi ne. Unë besoj në brohoritjen dhe në të gjitha shfaqjet dhe demonstrimet e Frymës, por megjithatë kjo nuk është ende ajo. Shikoni, është diçka tjetër. Është një krijesë e re, diçka në zemër (2. Korintasve 5:17).

Me anë të një Fryme ne jemi pagëzuar në këtë Trup, një Trup, i cili është Krishti, dhe ne jemi të sigurt përgjithmonë (1. Korintasve 12:13). Tani, kjo duket se i godet veçanërisht ata që besojnë sipas mësimit arminian, se ata duhet të bëjnë diçka për ta merituar vetë, ose ndonjë vepër të merituar. Si mund të vijë kjo në të njëjtën kohë nga dy gjëra? Ose është me anë të hirit ose me anë të veprave. Nuk mund të vijë nga të dyja këto gjëra kaq të ndryshme në të njëjtën kohë, por vetëm nga njëra prej tyre (Romakëve 4:1-16).

Unë thjesht nuk mund të shoh asgjë tjetër përveç hirit të Perëndisë. Kështu jam krijuar unë. Unë gjithmonë kam besuar në hir. Unë jam thjesht kudo me hir; kjo është e gjitha. Edhe në jetën time kur isha ende i ri, nuk mund të shihja asgjë tjetër veç hirit dhe hirit. Shikoni, hiri vepron nëpërmjet dashurisë. Edhe kur...

.... ti nuk ke bërë kurrë asgjë për mua dhe unë nuk kam fare të bëj me ty, nëse ke nevojë për diçka, unë përsëri do ta bëj. Hir, sepse ti ke nevojë për të... Unë kisha nevojë për shpëtim. Nuk kishte asgjë që mund të më shpëtonte. Nuk ka asgjë që unë mund të bëja për veten time. Unë nuk mund ta shpëtoja veten me asgjë. Por unë kisha nevojë për shpëtim, sepse besoja në një Perëndi. Dhe Perëndia dërgoi Birin e Tij, në ngjashmërinë e mishit mëkatar, që të vuante në vendin tim (Romakëve 8:3-4). Dhe unë u shpëtova; vetëm me anë të hirit u shpëtova. Nuk kishte asnjë gjë që unë mund të bëja ose që ti mund të bëje për ta shpëtuar veten. Ata që Ai i njohu më parë përpara themelimit të botës...

Që kur janë hapur Vulat dhe ne kemi zbuluar të vërtetën e këtyre gjërave, se sa besnik ka qenë Perëndia ndaj nesh, me hirin e Tij, duke na i treguar këto gjëra.

I mbështjellë me rrobat e drejtësisë së Tij. Jo me të miat, unë nuk kam asgjë prej tyre. Të miat janë leckat e ndyra e të papastra. Unë nuk do të doja të përpiqesha të hyja në Qiell me predikimin tim ose me vegimet e mia. Unë hyj në Qiell, sepse e mbaj fort hirin e Tij në zemrën time. Hiri i Tij; për këtë arsye hyj. Kështu hyjmë ne.

Jezusi, në lutjen e Tij drejtuar Atit, kërkoi vetëm një gjë. A e dini se çfarë ishte? Një gjë, pas gjithë flijimit të Tij që bëri këtu mbi tokë, pas jetës që jetoi, pas udhës që përshkoi. Ai kërkoi vetëm një gjë: **“Që aty ku jam Unë, të jenë edhe ata.”** Ai kërkoi bashkësinë tonë. Kjo është e vetmja gjë që Ai i kërkoi Atit në lutje: bashkësinë tënde përgjithmonë. Nëse doni ta lexoni këtë, është te Gjoni 17:24.

Sa shumë duhet të dëshirojmë Atë! Tani dëgjoni. Nëse je vërtet i lindur nga **Fryma e Perëndisë**, atëherë e gjithë kjo do të thotë shumë për ty. Shikoni, nuk është ndonjë libër rregullash. Ju nuk jetoni me ligje ose me gjëra të tilla. Ju jetoni me anë të hirit të Perëndisë, **Frymës së Perëndisë** (Romakëve 5:15).

Vini re! Tani, duke qenë se je një bir i Perëndisë në shtëpinë e Perëndisë, ti je një pjesë e familjes së Perëndisë. Romakëve 8:1: **“Prandaj tani nuk ka më asnjë dënim për ata që janë në Krishtin Jezus.”** Sepse ata janë të vdekur ndaj botës, të gjallë në Të, jetojnë në këtë kohë të tanishme dhe zbatojnë...

...Fjalën, për të cilën Perëndia dëshiron t'i përdorë ata. Ai i ka paracaktuar dhe i ka vendosur emrat e tyre në këtë **Libër të Nuses**. Dhe kur uji bie mbi këtë Farë, e cila është në zemër, ajo mbin për t'u bërë Nusja e Krishtit. Oh, aq e përsosur sa mund të jetë. Kështu ka qenë në çdo epokë. Luteranët ishin nën shfajësimin. Ajo filloi të rritej lart që nga këmbët. Wesley ishte nën shenjtërimin. Në ringjalljen Pentekostale ajo u ngrit deri te krahët, te veprat dhe veprimet. Por tani po vijmë te Koka, te **Guri i Kreut. Guri i Kreut** thirri: **“Hir! Hir!”** (Zakaria 4:6-7). Çfarë thërret **Guri i Kreut?** **“Hir! Hir!”** Nga vdekja dhe nga besimet dogmatike, në Fjalën e gjallë të Perëndisë së gjallë. I vetmi plan i përgatitur nga Perëndia për këtë epokë. Bijtë e Tij, në epokën e Fjalës, bëhen të gjallë nëpërmjet Frymës. Si një shkëndijë që ndez diçka, ata janë sjellë në jetë dhe tani janë vendosur në vendet qiellore (Efesianëve 2:4-6). Ata tashmë janë të gjallë dhe kanë pjesë në çdo premtim të Fjalës. Çfarë sjell kjo? Ju jeni një pjesë e trashëgimisë së Perëndisë, një pjesë e Fjalës; të tjerët janë një pjesë e Fjalës së Perëndisë, ulur së bashku, duke shfaqur tërë Trupin e Krishtit, sepse në mesin tuaj nuk ka maja (1. Korintasve 5:6-8). Asnjë maja në mesin tuaj, vetëm Fjala, të vendosur në vendet qiellore, te dera ku banon Emri i Tij: Jezu Krishti.

A nuk jeni të lumtur që jeni sot në këtë Kishë? Jo në këtë ndërtesë, por e kam fjalën në Kishë. Ekziston vetëm një Kishë. Dhe askush nuk mund të anëtarësohet në të. Nuk mund të marrësh dokumente anëtarësimi prej saj. Njeriu thjesht lind në të; kjo është e gjitha. Dhe kur lindni në këtë Kishë, është me anë të hirit. Ju nuk mund të kërkonit të hynit në të. Ju nuk kishit asnjë dëshirë për këtë. Vetë Perëndia e ka caktuar që ju të jeni në këtë Kishë. Nëse ndonjëherë jeni në këtë Kishë, Perëndia e dinte para themelimit të botës se ju do të ishit në këtë Kishë. Dhe Ai e caktoi dhe ju paracaktoi të jeni në këtë Kishë. A nuk është kjo e mrekullueshme?

“Kushdo që e dëgjon zërin Tim, do të vijë tek Unë.” A është e vërtetë kjo? **“Dhe të gjithë ata që Ati më ka dhënë do të vijnë tek Unë, dhe Unë do ta ringjall atë në ditën e fundit.”** (Gjoni 6:40; Gjoni 10:27-30).

Edhe nëse kohët janë të vështira. Perëndia nuk ka premtuar një shtrat me lule rehatie, por Ai ka premtuar hir të mjaftueshëm për çdo sprovë që mund të të godasë. Kjo është e vërtetë. Po, me të vërtetë, hiri është i mjaftueshëm. Jo një shtrat me lule rehatie, por Ai ka premtuar hir për të fituar në çdo tundim. Kur kryqi bëhet i rëndë, Krishti ka premtuar të jetë me ty.

Dhe për ata që presin Krishtin, që Ai të vijë për herë të dytë, ata që mund t'i mposhtin gjërat e kësaj bote me anë të hirit të Tij, që hyjnë në Të dhe i mbyllin sytë për çdo gjë tjetër përveç Tij dhe Fjalës së Tij, për ta Ai do të shfaqet për herë të dytë në lavdi.

“Dhe, ashtu siç është caktuar që njerëzit të vdesin një herë, dhe pas kësaj vjen gjykimi, po kështu edhe Krishti, pasi e dha Vetën një herë si flijim për të marrë mbi Vete mëkatet e shumë vetave, do të shfaqet për herë të dytë për ata që e presin, jo për shkak të mëkatit, por për shpëtim.” (Hebrenjve 9:27-28).

